

REGIONAL NEWS

HEADLINES

1. Mizorama African Swine Fever (AFS) hri a len thar leh avangin vawk 227 a thi leh tawh a vawk 48 suat a ni leh tawh bawk niin Vety department hotute chuan an sawi.
2. Tukin khawvar rual vel khan Lawngtlai dai, Mavula Filling Station piah lawk a PickUp chesual ah mi pahnih an thi.
3. Delhi High Court judge, Yashwant Varma chenna in-a sum tam tham tak hmuhchhuah nia sawi chungchanga in-house inquiry report chu Supreme Court website-ah a duh apiang chhiar theih turin dah a ni.
4. South Korea chhim chhak lam bialah nasa taka ram a kan avangin emergency puan a ni.



ASF

Tun hnai lawka African Swine Fever (ASF) hri a len thar leh tak avangin he vawk pulhri avang hian vawk 227 thi leh tawhin vawk 48 suat a ni leh tawh bawk niin Vety department hotute chuan an sawi.

Nikum December ni 24 atanga ni 80 chuang ASF vawk pulhri avanga vawk thi leh suat a awm tawh loh hnu-ah Lawngtlai district a Bungtlang South leh Lawngtlai khawpui bakah Mamit district-a Zawlnuam khua-ah vawk a thi tan a. Bungtlang South-ah nimin thleng khan vawk 188 a thi tawh a, Lawngtlai-ah vawk 77 a thi tawh bawk . Niminah khan vawk thi 5 a awm a, vawiinah erawh chuan a awm lo niin Vety department hotute chuan an sawi a, Lawngtlai-ah vawk 15 suat belh a ni thung. Vawk thi sample te hi Aizawla endik a nih hnu-ah Guwahati lamah nemngheh tura thawn a ni a, kar kalta Ningani khan Guwahati a laboratory lamin ASF ngei a ni tih an finfiah thu an rawn hrilh a ni.

He tih lai hian Vety department lamin Zawlnuam a vawk thi zat hi Zawlnuam Borai vengah 16 leh Zawlnuam Vengpui a 1 ni a an sawi lai-in an khaw tlang hotute erawh chuan nimin thleng khan Borai venga vawk 19, Thuampui vengah 13 leh Vengpui-ah vawk 3 a thi tawh niin Akashvani Aizawl an hrilh a ni.



REFUGEES

Home minister Pu K. Sapdanga’n Myanmar raltlan Mizorama awm mekte biometric data lak chungchangah thutlukna siam fel a la nih loh thu a sawi.

Pu K. Sapdanga chuan Mizorama awm mek Myanmar raltlan mi 33,505-te biometric data lakkhawmsak chungchang hi central Sorkar thuchhuak a ni tih sawiin, hemi chungchangah hian Ministry of Home Affairs (MHA) nena indawr mek zel a ni, a ti a. A hma lama MHA-in Myanmar raltlante biometric data lakna tura portal a rawn siam chu ramdangmi dan kalha lo lut, thawnkir leh turte chhinchhiahna atana hman tur chi a nih avangin Mizoram sorkar chuan siamtha leh turin a thawn let a. Tuna raltlan awm mekte hi an rama sipai sorkarin a tihduhdah hlauh vanga rawn tlanchhiate an nih avangin MHA-in portal a rawn siam chu hman theih a ni lo nia sawiin,siamtha tura an thawn let chu chhanna an la hmu lova nghah mek ani ati. An nunna atan hial a hlauhthawn avanga Mizorama rawn raltlan, an in leh lo chan vek leh hak thlak pawh nei lova Mizorama sahimna rawn zawng an awm lai-in an karah remchanna la a sumdawanna atana rawn hmang a sorkar phal loh thil rawn kenluh ching an awm thu sawiin home minister chuan he tiang mite chungchangah sorkar chuan ruahmanna siam a tum mek niin a sawi.

Bangladesh atanga raltlan chungchang sawi-in Pu K. Sapdanga chuan tun hnai a an Prime Minister paihthlak anih avanga Bangladesh ram buai chu sorkar laipui-in a buaipui nasa hle a. Chuvangin ramri vengtu BSF-te pawhin Mizorama rawn luh tumte chu thawnkir zel a tum a. Tualchhung mite nena inchuh chang pawh a awm niin a sawi a ni. Bangladesh atanga rawn lut Lawngtlai district a awm mekte hi mi 2,217 an ni a. Manipur atanga rawn tlan lut hi tun dinhmunah mi 2,633 an awm mek bawk. Raltlante tana sorkar laipui-in cheng vaibelchhe 5 hu buhfai a rawn pek chu district bawrhsapte kaltlangin sem chhuah zawh fel vek a ni tawhani.

PMJVK

Aizawl Vanapa Hall chu thiah a, a thara sak tura ruahman a ni a, a thawhna tur sum hi PMJVK hnuai-ah dil mek a ni.

Sorkar official-te hnen atanga thu dawn danin District Council & Minority Affairs Department-in Ministry of Minority Affairs-a hna hrang hrang thawhna tur 65 a theh luh zingah Vanapa Hall thiah leh sak thatna tur ruahmanna hi a tel a. Hemi atan hiang cheng vaibelchhe 37, nuai 78, sing 7 leh sang 4 dil a ni. Hei bakah hian Govt. T. Romana College academic building sakna, thawh khatna leh thawh hnihna atan cheng vaibelchhe 30 leh nuai 38 chuang dil a ni a, Govt. Johnson College academic building sakna atan cheng vaibelchhe 17 leh nuai 92 ,Lunglei Pukupui a Mizoram Engineering College sak tawh a taka hman theih tura chei thatna atan cheng vaibelchhe 14 leh nuai 83 chuang dil a ni bawk a ni.

Tun dinhmunah PMJVK hnuaia thawh tur dilna theluhte hi sorkar laipui-in pawm a la nei rih lo a ni.

<><><>

MISHAP

Tukin khawvar rual vel khan Lawngtlai dai, Siaha kawng lam, Mavula Filling Station piaah lawk a PickUp chesual ah mi pahnih an thi.

Pick up (Extra Long) chesualah hian a khalhtu Pu V. Lalhmangaihsanga Kum 42, Lawngtlai AOC Veng leh he motor a chuang Myanmar lam mi ni a hriat Pusanai kum 24, Angsanwai, Siktui, Myanmar mi te chu an thi a ni. Khalhtu Pu V. Lalhmangaihsanga hi Zirtawpni zan khan Rakhine State Myanmar-ah Bungrua dahin a thiante motor dang nen an kal a, an hawlam chu Lawngtlai daiah hian kawngthlangah tlan liamin, kawng lak atanga chuang ve Myanmar lam mi ni a hriat pahnih nen Motor hian a lumpuia, a hmunah pahnih an thi, he motor a chuang ve pakhat hliam tuar chu Damdawi ah dahluh a ni.

Chetsualna a thleng tih hriat a nih ve leh College Veng thalaite a hmunah kal nghalin, AOC Veng mipui bakah, chetsualna thlen chu hria apiangte'n chhanchhuah hna thawkin, ruang te, lakchhuah nghal an ni.

Pu V. Lalhmangaihsanga hian a nupui leh a fate pahnih a kalsan a, vawiin khan Doctor te'n ruang an enfiah hnu ah AOC Veng thlanmualah vuiliam a ni.

<><><>

NH TENDER

Mizoram chaklakna kawngpui Bilkhawthlir atanga Kolasib inkar leh Kawnpui atanga Khamrang inkarte chu siam that a nih theih na'n NHIDCL-in Tender a chhuah mek.

Bilkhawthlir atanga Kolasib inkar km 25-a thui leh Kawnpui atanga Khamrang inkar km 15-a thuite hi a siam thatna turin National Highway Infrastructure Development Corporation limited (NHIDCL) chuan Short-Term Maintenance Contract tender a chhuah a. Bilkhawthlir leh Kolasib inkar tan hian Cheng Vbc 38 leh nuai 68 ruahman niin, Kawnpui leh Khamrang inkar bakah Buichali lei atanga Sairang inkar siamna atan Cheng Vbc 48 leh nuai 43 ruahman a ni bawk. Kolasib District paltlangtu National Highway kawngpui tam zawk hi NHIDCL enkawl na hnuaiah awm tawhin, tuna Bilkhawthlir leh Kolasib inkar, Kawnpui leh Khamrang inkar te hi Mizoram PWD enkawl na hnuaiah a la awm a, kum 2020 July thla-ah NHIDCL hnena hlan chhawng tawh tura ruahman nimahse, chhan hrang hrang vangin NHIDCL hian enkawltu nihna a la lo a ni.

Tunah hian Kolasib District chhunga NHIDCL enkawl chin kawngpui te chu a siam that hna thawh mek a ni .

<><><>

TOURISTS

Nikum April thla atanga December thla thleng khan zinmi mi nuai 3, sing 6, sang 3 leh 69-in Mizoram an rawn tlawh.

Tourism department atanga thu dawn danin Mizoram rawn tlawhtu zinga nuai 3, sing 5, sang 9 leh 36 te chu ram chhung mi an ni a, mi 4,033 te chu ramdangmi an ni. Kum telin Mizoram rawn tlawhtu hi pung chho mah se, 2020-21 khan Covid-19 hrileng avangin zinmi an tlem hle a ram chhung mi 20,564 leh ramdangmi 3 chauh an lo zin a. Kum 2021-2022 khan hrileng a zia-awm deuh hnu-ah ramchhung mi nuai khat, sing 3 leh sang 2 chuang bakah ramdangmi 94 an lo zin a. A kum leh 2022-2023 tangka kum chhung khan ramchhung mi nuai 2, sing 1 leh sang 8 leh ramdangmi 3,554 an rawn zin a. Kum 2023-2024 tangka kum chhung khan mi nuai 2 sing 1 leh sang kaw chuang lo zinin ramchhung mi nuai 2, sing 1 leh sang 5 leh ram pawn mi 3,884 te an ni. Kum 2020-21 leh 2023-2024 tangka kum

inkar chhunga Mizoram rawn tlawhtu za zela 98 point 22 te hi ramchhung mi an ni a, za zela 1 point 78 te chu ramdangmi an ni.
Nikum December thla atang khan sorkar laipui chuan India hmarchhak state 3, Manipur, Mizoram leh Nagaland a ramdangmi luh khuahkhirhna a thlah dul tawh chu a tikhauh thar leh a. Hemi avang hian ramdang atanga lo zin zat hi a tlak hniam an rin thu official-te chuan an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.
Naktuk zing dar 7 leh a chanve-ah Chanchinthar puan leh a ni ang.

<><><>

SUPREME COURT UPLOADS

Delhi High Court judge, Yashwant Varma chenna in-a sum tam tham tak hmuhchhuah nia sawi chungchanga in-house inquiry report chu nizan khan Supreme Court-in an website-ah a duh apiang chhiar theih turin a dah. Phek 25 Report, Delhi High Court Chief Justice, DK Upadhyaya-a theh luhah hian India tangka kang bang thahnem tak hmuh anih thute, pawisa hmuhchhuah zan, March ni 14 Holi kut hman zana Justice Varma in kang thelh lai video leh thlalakte pawh a awm a ni.
Hemi chungchang chhui tur hian Chief Justice of India, Justice Sanjiv Khanna chuan member 3 awmna In-house Inquiry Committee a din a, Justice Varma chu court hna engmah pe hrih lo turin Delhi High Court Chief Justice a hriattir bawk a ni.
Justice Varma chuan a store room-ah amahin emaw a chenpuite emawin pawisa an dahlo nia sawiin amah tihhmingchhiat tumtute thil ruahman niin a sawi a ni.

<><><>

S KOREA WILDFIRES

South Korea ramchhung chhim chhak lamah nasa taka ram a kan avangin emergency puan a ni a, mi 4 an thih phah tawh a ni. Kangmei hi Gyeonsang province chhim leh hmar lam bialah a chhuak nasa zual a, thil tam tak a kangchhe tawh a ni.
Korea Forest Service chuan Busan leh Daejeon khawpui telin hmun 12 chu inralring tura hriattirna a tichhuak a, Ulsan leh Busan inkar kawngpui bakah motor kawngpui engemawzat khar a ni bawk.

<><><>